

SOALAN NO : 54

**PEMBERITAHUAN PERTANYAAN DEWAN RAKYAT
JAWAPAN OLEH YB DATUK SERI DR. S. SUBRAMANIAM
MENTERI KESIHATAN MALAYSIA**

PERTANYAAN : LISAN
DARIPADA : YB IR SHAHARUDDIN BIN ISMAIL [KANGAR]
TARIKH : 28 OKTOBER 2015
SOALAN :

YB Ir. Shaharuddin bin Ismail [Kangar] minta **MENTERI KESIHATAN** menyatakan apakah jumlah seramai 305,845 orang penderma organ yang telah berikrar untuk menderma organ sejak 1997 hingga Julai 2015 telah membantu pesakit-pesakit yang memerlukan dan apakah sasaran Kementerian bagi menjayakan kempen ini.

Tuan Yang di-Pertua,

Sehingga 31 Julai 2015, terdapat seramai 305,845 orang (1% daripada populasi rakyat Malaysia) yang telah berikrar sebagai penderma organ selepas kematian.

Sehingga kini, seramai 551 orang telah menderma organ mereka selepas kematian kepada lebih daripada 600 pesakit yang memerlukan. Namun begitu pihak Kementerian Kesihatan Malaysia (KKM) tidak mempunyai statistik yang tepat berapa ramai di kalangan penderma

organ sebenar selepas kematian (*actual deceased organ donor*) ini adalah merupakan pengikrar semasa hayat mereka.

Setakat 31 Ogos 2015, sebanyak 564 pemindahan organ melibatkan penderma selepas kematian telah dijalankan di Malaysia iaitu 499 pemindahan buah pinggang, 60 pemindahan hati, 25 pemindahan jantung, 6 pemindahan paru-paru serta 4 pemindahan jantung dan paru-paru.

Tuan Yang di-Pertua,

KKM menyasarkan sekurang-kurangnya 50,000 rakyat Malaysia berikrar setiap tahun sebagai penderma organ melalui kempen-kempen yang dijalankan. Bagi jangka masa panjang disasarkan 30% daripada jumlah populasi Malaysia berikrar sebagai penderma organ selepas kematian. KKM turut menyasarkan minima 50 orang penderma organ sebenar selepas kematian setiap tahun.

KKM amat menggalakkan ahli-ahli YB sekalian turut terlibat mengambil langkah yang lebih drastik dan aktif untuk mendidik masyarakat dan mempromosikan pendermaan organ khususnya di kawasan masing-masing.